

26/08/1998

Rakyat perlu sokong kepemimpinan Dr Mahathir

Ar Ahmad Lotfi

SEKALI lagi dengan izin Allah S.W.T kita akan menyambut ulang tahun Hari Kemerdekaan negara kita. Masa berjalan begitu pantas dan 41 tahun kita sudah merdeka.

Di sepanjang tempoh itu pemimpin bertukar ganti, masing-masing menjalankan tanggungjawab dengan bersungguh-sungguh untuk mengisi kemerdekaan negara, meletakkan negara di dalam keadaan aman damai serta makmur.

Pada peringkat awal usaha yang dijalankan oleh pemimpin ialah untuk menjadikan negara bebas daripada kekejaman komunis dan menghapuskan darurat. Mereka kemudian berusaha sungguh-sungguh membangunkan negara dari segi ekonomi, pendidikan dan perpaduan kaum.

Negara mencapai kemajuan di bidang ekonomi dan pendidikan yang sungguh mengagumkan. Kepentingan Bumiputera pula tidak diabaikan. Bagi menambah kekuatan kepemimpinan negara masa hadapan, anak-anak generasi merdeka diberi peluang melengkapkan diri dengan ilmu pengetahuan. Beberapa pusat pengajian tinggi disediakan. Tidak cukup di dalam negara, mereka dihantar ke luar negara dengan biasiswa sekali.

Kepemimpinan negara di bawah Datuk Seri Dr Mahathir Mohamad menambahkan lagi kemantapan negara. Dasar Pandang ke Timur yang diilhamnya membawa negara mengecap kejayaan yang sungguh menakjubkan di bidang industri.

Malaysia yang peringkat awal hanya mengeksport barang-barang elektrik kini memanjangkan lagi senarai barangan itu yang bermutu tinggi ke serata pelosok dunia. Negara kita menjadi contoh kepada negara sedang membangun yang lain. Tetapi menjadi lumrah alam, hasad dan dengki tidak pernah terhapus dari tamadun hidup manusia.

Sedang negara kita membangun dengan pesat, perpaduan rakyat berbilang kaumnya menakjubkan dunia dan pandangan Dr Mahathir banyak memberi kesedaran pemimpin dunia, ada pula pemimpin yang mengakui diri sebagai polis dunia, tidak senang hati dengan kemajuan pembangunan kita yang pesat dan pemimpin bersuara lantang.

Pelbagai usaha dijalankan untuk menggugat keutuhan dan kestabilan negara kita Malaysia yang tercinta ini. Tetapi kita yakin dengan ketabahan hati rakyat di bawah kepemimpinan Dr Mahathir dan perpaduan kukuh semua kaum, Insya-Allah laluan sukar yang sedang kita hadapi sekarang ini akan dapat diatasi dengan jayanya.

Apa yang perlu kita lakukan sekarang ialah terus mengukuhkan azam untuk melepaskan negara kita daripada kemelut kegawatan ekonomi dengan memberikan kerjasama sepenuhnya kepada kerajaan dan pemimpin kita.